

# Ezine GRSP: Samhradh 2025

## Clár an Ábhair

Fáilte.....	2
1. Tá SDTTÉ i mBun Chosaint na Tuaithe: Falscailte a Chosc an Samhradh Seo.....	2
2. Léirigh Stoirm Éowyn gá atá leis an pleanáil theagmhasach.....	4
2.b Scéim Deontais um Chosaint ar Thuilte d'Úinéirí Tí.....	5
2.c Downpatrick Flood Study foilsithe.....	6
3. Stoirm Bert – Freagairt na Croise Deirge i nDún Dónaill.....	7
4. An Chéad Chuart Ceiliúráin go TÉ don Chrois Dhearg.....	8
5. Ceardlann Seasmhachta Pobail Thuathcheantar Thír Eoghain.....	9
6. Sheol EnergyCloud NI an Chéad Tionscadal leis an Northern Ireland Housing Executive 10	
7. Ag coigilt fá choinne lá gréine sa bhaile agus ar an fheirm.....	11
8. An Feachtas Sábháilteachta <i>Look Up Look Out</i> .....	13
9. Ré Úr Oiliúna á hAdhaint: D'oscail SDTTÉ Coláiste Foghlama agus Forbartha ar fiú £50 milliún é.....	14
10. Seasmhacht á Daingniú don Ghrúpa Réigiúnach i leith an Leanúnachais Gnó nua.....	15
11. Foireann TÉ um Theagmhasacht Shibhialta san Oifig Meitéareolaíochta.....	16
12. Foilsíodh an tuairisc leis an Chros Dhearg, “Leochaileacht agus Seasmhacht”.....	17
13. Seolann Institiúid Náisiúnta Ríoga na mBád Tarrthála (INRBT) Feachtas ‘ <i>Float to Live</i> ’ i ndiaidh Tarrthála a bhí ráthúil.....	19
14. Nuacht GUED fá Sheimineár, Cúrsaí Scoir agus Cúrsaí Foirne.....	21

## Fáilte

Fáilte chuig eagrán an tsamhraidh den nuachtlitir, *Getting Weather Ready*, ina dtugtar neart leideanna agus comhairle ar chéimeanna simplí a thig linn uilig a ghlacadh le muid féin a ullmhú don aimsir sna míonna romhainn. #Weather Ready

### 1. Tá SDTTÉ i mBun Chosaint na Tuaithe: Falscailthe a Chosc an Samhradh Seo

*Tá Seirbhís Dóiteáin agus Tarrhála Thuaisceart Éireann (SDTTÉ) ag iarraidh go mbeidh achan duine ag cuidiú leo falscailthe a chosc an samhradh seo fríd threoir shimplí a leanúint agus sinn amuigh fán tuath.*

Tá an samhradh linn, agus nuair a bhíonn cuid mhaith againn ag baint sult as an tsaol amuigh faoin spéir, bíonn SDTTÉ ag láimhseáil chontúirtí na bhfalscailthe.

Cheana féin i mbliana, chuaigh foirne SDTTÉ i ngleic le neart falscailthe móra dúshlánacha – ceann acu i mí Aibreáin, a fógraíodh ina mhórtéagmhas. Le linn thréimhse 10 lá i mí Aibreáin, chuaigh SDTTÉ amach chuig 390 falscailthe, rud a chuir brú ollmhór ar na comhraiceoirí dóiteáin agus ar acmhainní.

Ghní na falscailthe dochar do-athraithe don chomhshaol agus don dúlra, agus bíonn siad fiú ina mbagairt do thithe agus beatha an duine.

Bíonn gníomh an duine taobh thiar de thromlach na bhfalscailthe i dTuaisceart Éireann. Fágann sin go bhfuil siad inchoiscthe.

#### **An Rud a Thig Leat a Dhéanamh le Cuidiú**

Tig le achan duine againn ár gcion a dhéanamh leis an tuath a chosaint an samhradh seo. Seo roinnt gníomhartha, atá simplí ach ríthábhachtach, a thig leat féin a dhéanamh:

- Ná las tine choíche amuigh fán tuath
- Ná bíodh an fulacht agat ach amháin in áit atá sainithe dó sin agus ná fág choíche é gan duine á fhaire
- Múch toitíní mar is ceart agus ná caith iad choíche ar an talamh nó amach ar fhuinneog an ghluaisteáin.
- Ná fág buidéal, gloine nó bruscar i do dhiaidh

#### **Bí ar an Airdeall, Bí Freagrach**

Má bhíonn tú amuigh faoin spéir an samhradh seo, ag baint sult as ag radhairc áille na tuaithe s'againn, bí ar an airdeall fá chomharthaí tine. Má tchí tú falscaí:

- Gabh go háit atá slán
- Cuir scairt ar 999 agus iarr an tSeirbhís Dóiteáin & Tarrhála
- Ná féach le dul i ngleic leis an tine thú féin

Tá SDTTÉ tiomanta do chosaint na timpeallachta agus do shábháilteacht an phobail. Ach ní thig leo é a dhéanamh leo féin. Fríd a bheith airdeallach fá dhóiteáin, agus a bheith ag spreagadh daoine eile leis an rud chéanna a dhéanamh, cuidíonn tú go mór le ceantar tuaithe Thuaisceart Éireann a chosaint do na glúnta atá le teacht.

Oibrimis le chéile an samhradh seo le stop a chur le falscailthe sula dtosaíonn siad.

Le tuilleadh eolais a fháil, tabhair cuairt ar: [www.nifrs.org](http://www.nifrs.org).

*Ainm na híomhá: 1.1*

*Fotheideal: Spéartha lán toite os cionn na mBeanna Boirche, agus na comhraiceoirí dóiteáin ag obair leo san iargúil le falscaí a smachtú.*

*Ainm na híomhá: 1.2*

*Fotheideal: D'fhreagair comhraiceoirí dóiteáin ar fhalscaí faoi dhálaí dúshlánacha sna , agus rud a léiríonn éirim, diongbháilteacht, agus comhoibriú.*

*Ainm na híomhá: 1.3*

*Fotheideal: Comhraiceoirí dóiteáin ag freagairt ar fhalscaí, ag obair go dian leis na lasracha a chur faoi smacht agus an ceantar máguaird a chosaint.*

## 2. Léirigh Stoirm Éowyn gá atá leis an pleanáil theagmhasach.

*Ba tharlú aimsire thar a bheith cumhachtach agus stairiúil é Stoirm Éowyn – an doineann is gairbhe i dTuaisceart Éireann ó bhí Stoirm Lá Fhéile Stiofáin 1998 ann. Ar an 24 Eanáir, chuir sí as go mór don réigiúin ar fad. Bhí luais na gaoithe suas le 80-100 míle san uair. Mar gheall ar cé chomh crua is a bhí an stoirm, chuir an Oifig Meitéareolaíochta comhairle ar fáil go luath, agus d’eisigh sí an chéad rabhadh dearg aimsire a bhí ann riamh i dTuaisceart Éireann, rud a chuir cónaitheoirí ar an airdeall fá na coinníollacha as cuimse a bhí tuartha. Ina theannta sin, cuireadh teachtaireacht foláirimh chuig thart fá **4.5 milliún guthán póca** ar fud Thuaisceart Éireann agus chuig áiteanna in Albain—rud éigin nach ndearnadh riamh, agus rud a bhí dírithe ar shábháilteacht an phobail a chinntiú.*

Bhí an-tionchar aige seo: fuair an Roinn Bonneagair (RB) níos mó ná 3,000 teachtaireacht ina ndeirtear gur raibh crainn tite agus go raibh smionagar ag blocáil na mbóithre. Bhí freagra ollmhór ilghníomhaireachta de dhíth le bealaí a ghlanadh, rochtain ar bhonneagar rithábhachtach a athbhunú, seirbhísí bunriachtanacha a choinneáil agus sábháilteacht an phobail a chinntiú.

In ainneoin cé chomh crua is a bhí an eachtra, sheas comhlíonadh dhualgais NIE Networks amach mar eiseamláir den tseasmhacht agus den cheannasaíocht nuair a d’fhreagair siad. Nuair a bhí an stoirm faoi lán seoil, chaill 285,000 áitribh leictreachas. Cé nach raibh NIE Networks ábalta foirne deisiúcháin a thabhairt le chéile le linn an fholáirimh dheirg, mar gheall ar imní sábháilteachta, thug siad cumhacht ar ais do 75% de na háitribh a raibh tionchar na stoirme orthu taobh istigh de 48 uair an chloig. Glacadh deich lá le cumhacht a thabhairt ar ais go hiomlán, rud a chuir béim ar a dhonacht a bhí an dúshlán. Bhí ról lárnach ag NIE Networks sna hiarrachtaí i bhfreagairtí éigeandála agus thug siad roinnt bearta nuálacha isteach:

- **Tacaíocht d’Ionad Rialaithe Tráchta** – Chuir NIE Networks baill foirne isteach san ionad, rud a neartaigh an comhordú leis an Roinn Bonneagair.
- **Ionaid Chuidithe do Phobail** – d’fhreastail baill foirne ar **68 ionad**, rud a chiallaíonn gur cuireadh eolas rithábhachtach ar fáil do chónaitheoirí agus chuir Comhairlí deochanna teo ar fáil, chomh maith le háiseanna cithfholcadáin.
- **Láimhseáil Leathnaithe Scairteanna** – Osclaíodh ionad scairteanna eile le déileáil le **164,000 scairteanna agus 96,000 teachtaireachtaí** dhigiteacha ón phobal.
- **Léarscáiliú Comhtháite don Tacaíocht Rithábhachtach** – Ina gcuid oibre i gcomhar le soláthraithe uisce, bhí NIE Networks ar thús cadhnaíochta maidir le léarscáil a chruthú a chuireann in iúl na ceantair ina raibh na trí seirbhísí riachtanacha cailte. Chuidigh sin le soláthraithe cúraim le daoine leochaileacha a aimsiú agus cuidiú leo ar bhealach níos éifeachtaí.

Mar gheall ar an stoirm agus an méid ama a glacadh le achan rud a thabhairt ar ais, tarraingíodh aird ar an spleáchas atá ag an tsochaí ar leictreachas chomh maith leis an ghá le pleananna teagmhasacha a bheith ag daoine, teaghlaiigh agus eagraíochtaí. Ós rud é go bhfuil tarluithe adhairsire ag éirí níos coitianta, tá sé dosheachanta go mbeidh gearrthacha leictreachais ann, go ndruidfear bóithre agus go mbeidh dúshlán chumarsáide ann. Is meabhrú cumhachtach é Stoirm Éowyn go bhfuil ullmhúchán láidir, cumarsáid

shoiléir, agus freagairtí dírithe ar an phobal le seasmhacht riachtanach ionas go dtiocfaidh muid uilig slán as na stoirmeacha san am atá le teacht.

*2.1-2.5 Foscríbhinn na híomhá: NIE Networks ag obair leo go crua leis an chumhacht a athchóiriú i ndiaidh Stoirm Éowyn*

*2.6 Líne ama ón Oifig Meitéareolaíochta ar Stoirm Eowyn*

### *2.b Scéim Deontais um Chosaint ar Thuilte d'Úinéirí Tí*

Is scéim rialtais í an Scéim Deontais um Cosaint ar Thuilte d'Úinéirí Tí (Tuaisceart Éireann). Cuidíonn sí le húinéirí tí athruithe a dhéanamh le huisce tuile a choinneáil amuigh.

Bunaíodh an scéim seo in 2016, tá sí faoi riar ag Roinn Bonneagair, agus tá sí dírithe go háirithe ar thithe cónaithe amháin a bhí faoi thuile roimhe agus atá go fóill i mbaol mar gheall ar thuile rialta.

I ndiaidh an tuile Thoir Theas i bhfomhar na bliana 2023, rinneadh athbhreithniú ar an scéim maidir leis na critéir cháilitheachta agus an próiseas iarratais, agus dá bharr sin, rinneadh leasú ar na critéir cháilitheachta sa dóigh a leanas:

Áitribh fána bhfuil na húinéirí ábalta fianaise infhíoraithe a chur ar fáil, a chruthaíonn go raibh an siad faoi uisce uair amháin nó níos mó le 25 bliain anuas.

Seo laghdú ar an chéad chritéir faoina raibh sé riachtanach fianaise go raibh dhá tharlú tuile ann, nó níos mó, taobh istigh de 25 bliain. Cuireadh athruithe eile i bhfeidhm le cuidiú leis an phróiseas measúnachta d'iarratasóirí a chuíchóiriú. Bíodh sin mar atá, ceanglaítear ar iarratasóirí a léiriú gurb iadsan úinéirí na an áitribh.

Cuireadh athbhreithniú eile i gcrích ar an tairseach do chistiú ó dheontais. Nuair a thosaigh an scéim in 2016, chlúdaigh an cistiú ó dheontais 90% de na costais, suas le £10,000 de na costais iomlána don tsuirbhé agus don tsuiteáil, agus bhí ar úinéir an tí costas breise 10% a íoc chomh maith le costais ar bith eile a bhí thar an tairseach seo de £10,000. I ndiaidh an athbhreithnithe is deireanaí seo, méadóidh tairseach an deontais ó £10,000 go £13,700, le méaduithe boilscitheacha a chur san áireamh. Tíocfaidh seo i bhfeidhm d'iarratais a gheofar i ndiaidh 1 Mí Aibreáin 2025.

Go nuige seo, cuireadh bearta in 165 teach, bearta a cuireadh ar fáil faoi bhun na scéime. Táthar ag súil leis go mbainfidh úinéirí tí, atá ag iarraidh seasmhacht a n-áitribh a fheabhsú, leas as an chistiú breise agus as an chritéir cáilitheachta feabhsaithe.

Tá na sonraí ar fad faoin scéim agus an dóigh le hiarratas a chur isteach fána coinne ar fáil ag: <https://www.infrastructure-ni.gov.uk/articles/homeowner-flood-protection-grant-scheme>

*Foscríbhinn na híomhá: 2B.Q Postaí sliotáin na bacainne mar aon le clúdaigh*

*2b.2 Clúdaigh Aerbhrí*

### [2.c Downpatrick Flood Study foilsithe](#)

Baineadh úsáid as ionsamhlú ríomhairithe ar chásanna tuilte a d'fhéadfadh a bheith i nDún Pádraig le fáil amach an bealach is fearr lleis an riosca go dtarlódh na nithe céanna agus a thit amach i bhfomhar na bliana 2023 a laghdú

Sa staidéar chuimsitheach a rinneadh ar an tuile i nDún Pádraig, scrúdaíodh réimse de chásanna agus réitigh a d'fhéadfaí a úsáid: an rogha is fearr ná sprioc-chaighdeán fá choinne cosaint in aghaidh tuilte a chur ar fáil do 106 áitribh.

Anois, déanfar tuilleadh oibre le cás gnó a chur le chéile fá choinne scéim maolaithe tuilte a d'fhéadfaí a chur i bhfeidhm, lena n-áirítear measúnacht mhionsonraithe lena fháil amach an mbeadh an rogha tosaíochta seo inmharthana ar bhonn eacnamaíoch.

Tá an staidéar ar fáil anseo [Downpatrick Feasibility Report \(May 2025\) | Department for Infrastructure](#)

### 3. Stoirm Bert – Freagairt na Croise Deirge i nDún Dónaill

Tharla tuilte crua go tobann i dtithe i nDún Dónaill. Mar gheall ar uisceleibhéil a bhí ag ardú go gasta, bhí ar roinnt cónaitheoirí dul suas staighre le sábháilteacht a fháil. D'oibrigh Seirbhís Dóiteáin agus Tarrthála Thuaisceart Éireann (SDTTÉ) gan staonadh, ach rinneadh an t-uafás damáiste ar shráid amháin, agus a scriosadh bunurláir go huile is go hiomlán.

I measc na ndaoine a i ndeachthas i bhfeidhm orthu, bhí Hannah, a páirtí agus a mac atá naoi mí d'aois. Nuair a tharla an tuile, bhí an teaghlach ag glanadh amach an tí, agus bhí a sealúchas uilig thíos staire go sealadach. Go tragóideach, cailleadh achan rud - éadaí, rudaí riachtanacha do bhabhaithe agus fiú an crann Nollag, atá anois i scipe bruscair. Cé gur sheas na cairde agus daoine muinteartha s'acu leo, ag tabhairt éadaí agus pram nua don bhabaí, bhí géarghá le tacaíocht ag an teaghlach.

D'fhreagair an Chros Dhearg go gasta. D'fhreastail siad faoi dhó ar lá an tuile le cuidiú praiticiúil agus cuidiú mothúchánach a thabhairt. Chuir oibrithe deonacha iad ar a suaimhneas, cuidigh siad le riachtanais phráinneacha a mheasúnú, agus thacaigh siad le pearsanra éigeandála a bhí ar an láthair. Tháinig baill foirne de chuid na Croise Deirge ar ais sna laethanta ina dhiaidh sin nuair a tháinig scipeanna bruscair a chuir an chomhairle ar fáil, agus thosaigh na cónaitheoirí ag glanadh amach a dtithe, rud a bhí ina chrá croí dóibh.

In aimsir shioctha, chuir oibrithe deonacha de chuid na Croise Deirge spás te sábháilte ar fáil taobh istigh dá bhfeithicilí. Chuir siad ar fáil deochanna teo ar agus le bomaite sóláis do na cónaitheoirí a bhí ag tabhairt faoi thasc an-dúshlánach le cibé rudaí shábháil agus a thiocfadh leo. Ba mhór an drochthionchar a bhí aige seo ó thaobh na mothúchán de, ach ba mhór an difear a rinneadh toisc go raibh tacaíocht chomhbhách ann.

Is fada an turas a bheidh ann do mhórán daoine le teacht ar ais, ach a bhuí le seasmhacht an phobail agus le tacaíocht éigeandála, ní beidh duine ina aonar agus é ag dul i ngleic le rudaí.

#### *3.1 & 3.2 Tuilte le linn Stoirm Bert.*

## 4. An Chéad Chuairt Ceiliúráin go TÉ don Chrois Dhearg

Is mór an onóir don Chros Dhearg an réalta Hollywood Joely Richardson a óstáil i mBéal Feirste, áit ar bhuail sí le Foireann Freagartha na Croise Deirge. Le linn na cuairte s'aici, tarraingíodh aird ar obair ríthábhachtach an charthanais le tacaíocht a thabhairt do phobail ar bhuail tarlú adhaimsir orthu, Storim Bert agus Storim Darragh ina measc, a d'fhág níos mó ná 45,000 tithe leictreachas ar fud Thuaisceart Éireann.

Mar chuid den turas s'aici, thug Joely cuairt ar cheantair ar bhuail tuile orthu le gairid agus labhair sí go díreach le cónaitheoirí a bhí buailte ag na tuile. Chonaic sí an dóigh ar thug baill foirne agus oibríthe deonacha de chuid na Croise Deirge tacaíocht ríthábhachtach fríd sheiceálacha leasa a dhéanamh ó dhoras go doras agus fríd ionaid phráinfhreagartha i nDomhnach Daoi, ar an Ómaigh agus ar an Bhaile Meánach.

Bhí an lá lán le comhráite fiúntacha, agus chaith Joely am le baill foirne agus le hoibríthe deonacha, a roinn a gcuid scéalta léi fá dheochanna teo, pluideanna agus áiseanna luchtaithe a chur ar fáil do chónaitheoirí a bhí buailte ag an tuile nuair a bhí siad ag obair i gcomhar le NIE Networks.

Sa tráthnóna, glac sí páirt i gcomhráite fiúntacha le ranna rialtais agus le freagróirí reachtúla fá na dúshlán atá ann sa domhan seo atá ag athrú, agus an ról lárnach atá ag an Chros Dhearg i bhfreagairt géarchéime ilghníomhaireachta.

I rith na cuairte bhí atmaisféar suaimhneach ann mar gheall ar an bhealach dheas the le Joely. Bhí neart gáire, tae agus brioscaí ann. Mar gheall ar an fhíorspéis atá ag Joley sa Chrois Dhearg, chomh maith leis an bhaint atá aici léi, tá sí breá ábalta labhairt fá obair na Croise Deirge ar fud an thírdhreacha ilghníomhaireachta, rud a tharraing aird ar thiomantas na n-oibríthe deonacha agus na mball foirne ina dtacaíocht do phobail leochaileacha ar fud Thuaisceart Éireann.

*4.1 & 4.2 Buaileann Joely Richardson le baill foirne agus cónaitheoirí le linn na cuairte le déanaí.*

## 5. Ceardlann Seasmhachta Pobail Thuathcheantar Thír Eoghain

Reáchtáladh Ceardlann Seasmhachta don Phobal le gairid do bhaill de na Grúpaí Seasmhachta Pobail Thuathcheantar Thír Eoghain, le heolas agus treoir a chur ar fáil do phobail áitiúla fán dóigh le freagairt ar chásanna éigeandála agus fán dóigh le cur le seasmhacht an phobail.

D'fhreastail réimse leathan comhpháirtithe ilghníomhaireachta ar an cheardlann a reáchtáladh i ndiaidh Stoirm Éowyn agus an tionchair a bhí aici ar an phobal áitiúil, go háirithe na fadhbanna a bhí acu maidir le teipeanna teileachumarsáide i gceantar na Speiríní. Dearadh an cheardlann le treoir a chur ar fáil do na Grúpaí Seasmhachta Pobal (GSPanna), ar ullmhacht, freagairt agus ar téarnamh i gcomhthéacs seasmhachta an phobail.

Thug na comhpháirtithe ilghníomhaíochta a bhí i láthair ag an imeacht achoimre ghairid ar ról agus freagrachtaí na ngníomhaíochtaí reachtúla, agus ar na bearta maolaithe a chuirtear i bhfeidhm i ndiaidh rabhadh aimsire. Tá sé mar aidhm aige seo cuidiú le rannpháirtithe smaoineamh ar cad é atá le déanamh acu ar bhonn an duine aonair, ar bhonn teaghlaigh agus ar bhonn an phobail, le hullmhú d'éifeachtaí adhamsire, déileáil leo agus teacht ar ais uathu.

I measc na ndaoine a thug caint ag an cheardlann, bhí Damien Gavin, Bainisteoir Seasmhachta NEPG, a thug achoimre ar struchtúir de chuid Teagmhasacht Shibhialta an Rialtais Áitiúil agus Seamus McCann ó Aibhneacha Roinne Bonneagair agus atá ina Chomhchaitheoirleach sa GSPTT. Thug seisean achoimre ar ról eagraíochtúil na Roinne Bonneagair i bhfreagairt ar thuilte. D'fhreastail Eddie McChrystal agus Philip Hosey ó Raynet ar an cheardlann fosta, a thug achoimre dóibh siúd a bhí i láthair maidir lena gcuid oibre, agus a chuir in iúl dóibh go bhfuil tacaíocht ar fáil do phobail tuaithe arbh fhéidir í a chur i bhfeidhm mar fhreagairt ar chliseadh ar an teileachumarsáid nó briseadh éigeandála a bhaineann leis.

I measc rannpháirtithe eile bhí Neil Bratton, ó DfI Roads, Anthony McGirr ó NI Water agus Louise Johnston, ón Chros Dhearg. Thug Louise léi an fheithicil ón Chros Dhearg a bhí amuigh ar fud an cheantair i ndiaidh Stoirm Éowyn ag tabhairt tacaíochta dóibh siúd a bhí scartha amach mar gheall ar an stoirm.

Thug Ciara Toner, Oifigeach Tionscadail do Chomhpháirtíocht na Speiríní, uasdátú gairid. - Is ceanntionscadal traschomhairle é Tionscadal Comhpháirtíochta na Speiríní a bhfuil sé mar aidhm aige oidhreacht nádúrtha, thógtha agus chultúrtha na Speiríní a bhainistiú fríd na pleannanna gníomhaíochta *Future Search Action Plans* atá aitheanta- <https://sperrinspartnershipproject.com/>

Dúirt Anne Gallagher, Oifigeach Seasmhachta ag Comhairle Chathair Dhoire agus Cheantar an tSraitha Báin, go raibh an cheardlann an-dearfach fiúntach d'achan duine a bhí páirteach agus ghabh sí buíochas le achán duine a ghlac páirt.

### 5.1 & 5.2 D'fhreastail cónaitheoirí ar an Cheardlann Seasmhachta don Phobal

## 6. Sheol EnergyCloud NI an Chéad Tionscadal leis an Northern Ireland Housing Executive

Sheol EnergyCloud NI an Chéad Tionscadal i dTuaisceart Éireann, ag úsáid fuinneamh in-athnuaite le dul i ngleic le bochtaineacht bhreosla. I gcomhar leis an Northern Ireland Housing Executive, cuirfidh an tionscnamh uisce te saor in aisce ar fáil do suas le 20 teaghlach ar an Ómaigh.

Bhí na tithe bainteacha feistithe le gléasanna cliste atá cumasaithe le EnergyCloud, a úsáideann fuinneamh inathnuaite le humair tumtha a théamh. Murach sin, bheadh an fuinneamh sin curtha amú. In 2024 amháin, laghdaíodh 915 GWh d'fhuinneamh gaoithe ar fud Thuaisceart Éireann—go leor fuinnimh le thart fá 305 milliún umar d'uisce a théamh. Fríd an fuinneamh seo a atreorú, is féidir cuidiú le teaghlaigh atá ag streachailt mar gheall ar chostais bhreosla le méideanna fiúntacha airgid a shábháil.

Tacaíonn SONI, NIE Networks, Budget Energy, Click Energy, agus SSE Airtricity leis an tionscadal píolotach seo.

Dúirt Jamie Delargy, Caitheoirleach EnergyCloud NI: “Is bunriachtanas sóisialta é an rochtain ar fhuinneamh inacmhainne, inbhuanaithe. Ag an am chéanna, cuireann muid méideanna móra fuinnimh in-athnuaite amú mar gheall ar chiorrú. Is féidir tionchar ollmhór marthanach a bheith ann má atreoraítear an fuinneamh seo chuig theaghlaigh atá i mbochtaineacht bhreosla. Tá muid buíoch dár gcomhpháirtithe fuinnimh as na hathruithe seo.”

Dúirt Robert Clements, Ceannasaí Fhorbairt Inbhuanaithe ag an Feidhmeannacht Tithíochta: “Is áthas orainn dul i gcomhar le EnergyCloud NI ar thionscadal a laghdaíonn costais fuinnimh dár dtionóntaí, agus anuas air sin, tionscadal a thacaíonn lenár spriocanna inbhuanaitheachta.”

D'fhreastail ionadaithe ó National Energy Action NI, ó RenewableNI, agus ó sholáthraithe leictreachais ar an imeacht seolta.

Dúirt Lesley Robinson, Stiúrthóir Oibríochtaí ag Budget Energy agus Flogas Ireland: “Cuidítear linn dul i ngleic le bochainneacht bhreosla agus todhchaí inbhuanaithe a thógáil fríd leas a bhaint as fuinneamh in-athnuaite.”

Dúirt Andy Porter, Stiúrthóir Bainistíochta ag Click Energy: “Is ábhar bróid dúinn tacú leis an tionscnamh nuálach seo a mbaineann daoine i mbochtaineacht bhreosla leas as.”

Mar fhocal scoir, dúirt Delargy: “Ní ach tús an scéal é seo. Tá sé beartaithe againn ár n-iarrachtaí a leathnú lena chinntiú go mbaineann níos mó teaghlach arís leas as fuinneamh in-athnuaite breise.”

*Foscúbhinn na híomhá: 6.1 Sa phictiúr ag seoladh comhpháirtíocht EnergyCloud NI agus NIHE, tá: (LR) Emma Stubbs, Stiúrthóir Cúnta Sustainable Homes, Robert Clements, Ceannasaí Forbairt Inbhuanaithe, Jamie Delargy, Caitheoirleach EnergyCloud NI agus Angus Kerr, Stiúrthóir Athrú Aeráide ag An Roinn Pobal*

## 7. Ag coigilt fá choinne lá gréine sa bhaile agus ar an fheirm

Agus an samhradh ag druidim linn, tá NI Water ag díriú airde ar an teachtaireacht seo: gurb é seo an t-am le smaoineamh ar an dóigh a n-úsáideann muid ár n-uisce le linn na míonna den aimsir níos teo. Cuideoidh sé seo uisce a chaomhnú do na hamanna ina mbíonn atá sé de dhíth orainn agus cuideoidh sé linn an méid a chaitfidh muid a íoc ar bhíllí fuinnimh dár dtithe a laghdú. Buntáiste amach is amach!

Is féidir le custaiméirí feidhm a bhaint as an iniúchadh uisce ar líne NI Water [www.getwaterfit.com](http://www.getwaterfit.com) le fáil amach cá mhéad uisce a úsáideann siad ina dtithe chomh maith le bealaí nua a fhoghlaim le hairgead a shábháil. Is ábhar iontais é cá mhéad duine againn a dhéanann meastachán faoina luach maidir leis an méid uisce a úsáideann muid inár dtithe ar bhonn laethúil.

Mhínigh Anna Killen, Oifigeach Oideachais NI Water: **“Tá an t-ádh linn a bheith inár gcónaí i dtír ina bhfuil cuid mhór uisce, ach de thairbhe na haeráide atá ag athrú agus daonra atá ag fás, seans nach é sin mar a bheidh i gcónaí.**

**“Tá aithne againn ar an fhrása fá ‘rud a chur ar leataobh do lá na coise tinne’ ach is gá dúinn smaoineamh ar rudaí a chur ar leataobh do ‘lá gréine’ agus nósanna a chruthú a chuideoidh linn airgead a shábháil i rith na bliana ar fad. Rudaí simplí amhail an sconnna a chasadh as nuair a scuabann tú do chuid fiacla tú, babhla a úsáid le glasraí a ní, meaisín níocháin a líonadh i gcónaí, agus crúiscín uisce a choinneáil sa chuisneoir: is féidir leis na rudaí seo uilig difear a dhéanamh. Sconnaí atá ag sileadh a réiteach, canna spréite a úsáid seachas píobán: Cuidíonn siad seo fosta.**

**“Tá dúshlán spárála uisce ar fáil ag an iniúchadh uisce ar líne NI Water ag [www.getwaterfit.co.uk](http://www.getwaterfit.co.uk) agus tá smointe eile ar fáil amhail amadóirí cithfholcadáin 4 bhomaite, amadóir do ghlanadh fiacla agus málaí *swell gel* don ghairdín.”**

Ba mhaith le NI Water cur i gcuimhne d’fheirmeoirí a méadair uisce a sheiceáil sula gcuireann siad soláthair uisce ar siúl arís don tsamhradh toisc más féidir sceitheadh uisce a aimsiú, is féidir billí arda uisce a sheachaint, go háirithe agus an aimsir ag éirí níos teo sna míonna samhraidh atá le teacht.

Dúirt Ciaran Diamond, bainisteoir ceantair líonraí uisce NI Water: **“Tá muid ag iarraidh ar fheirmeoirí a méadair a sheiceáil go rialta, is é sin an bealach is fusa dóibh sceitheadh a fheiceáil, má tá ceann acu. Nuair a bhíonn feirmeoirí ag íoc as a uisce, is airgead in aisce dóibh achan sceitheadh. Fríd sheiceáil a dhéanamh ar na méadair, na sconnaí taobh amuigh, an talamh agus na trachanna, is féidir sceitheadh ar bith a dheisiú go gasta agus ansin, bille mór a sheachaint”**

Má aimsíonn feirmeoirí sceitheadh, ba chóir dóibh an soláthar a scaradh, más féidir, agus teagmháil a dhéanamh le pluiméir WaterSafe fá choinne cuidithe [www.watersafe.org.uk](http://www.watersafe.org.uk).

### Críoch

Fiosruithe na Meán chuig Preasoifig NI Water fríd ríomhphost chuig [press.office@niwater.com](mailto:press.office@niwater.com)

*Foscúibhinn na híomhá:*

*7:1 Is féidir leis a bheith ina bheart spárála uisce crúiscín uisce a choinneáil sa chuisneoir toisc nach gá an sconna a chur a ghabháil le huisce óil fuar a fháil.*

*7:2 Ba chóir d'fheirmeoirí a méadair a sheiceáil go rialta, is é sin an bealach is fusa dóibh sceitheadh a fheiceáil, má tá ceann acu.*

## 8. An Feachtas Sábháilteachta *Look Up Look Out*

**Tá NIE Networks ag iarraidh ar dhaoine amharc suas agus aire a thabhairt ina fheachtas sábháilteachta *Look Up Look Out*.**

**Tá sé an-tábhachtach a cuimhneamh mbíonn tú i gcónaí cóngarach do trealamh de chineál éigin atá ar an líonra, bíodh sé gur línte cumhachta lastuas, cáblaí faoi thalamh nó suiteálacha tí / tráchtála iad.**

Maidir le gníomhaíocht ar bith amhail ithir bhreie a charnadh nó rud ar bith a ardaíonn leibhéal an talamh, íslíonn siad an t-achar idir an talamh agus na línte cumhachta lastuas. Laghdaítear an t-achar idir tú féin agus na línte fosta má thugtar innealra níos mó isteach, rud a mhéadaíonn an riosca go mbeadh timpistí ann.

Mar shampla, má tá tú ag gearradh crann nuair atá tú ar an talamh s'agat féin, is é an chomhairle a thugtar ná fanacht cúig mhéadar ar a laghad ar shiúl ó línte cumhachta lastuas, cuailí, nó trealamh eile leictreachais. Bíodh sin mar atá, má tá amhras ort fá shábháilteacht na hoibre, is féidir le NIE Networks cranneolaí a chur amach saor in aisce le glanspásanna sábháilteachta don líne lastuas a sheiceáil agus a chothabháil.

Faraor, mar a thuigeann daoine go rímhaith, bíonn tionchar uafásach ag timpistí ar theaghlach agus ar phobail. Tá sé riachtanach achan rud a dhéanamh agus is féidir le gortaithe agus básanna a sheachaint. Is tábhachtach an teachtaireacht *Look Up, Look Out* .i. “amharc suas, amharc amach”. Tá sé chomh tábhachtach céanna go mbíonn gnólachtaí eolach ar threoirlínte an FSSTÉ.

Uaireanta ní bheidh sé soiléir cad é an cur chuige is fearr agus sna cásanna sin, tá sé ríthábhachtach go gcuirtear scairt ar NIE Networks. Tá comhairle phraiticiúil, léarscálacha na líonraí agus seirbhísí eile ar fáil saor in aisce ó bhaill foirne an ionaid teagmhála.

- Na déan a dhath má tá amhras ar bith ort fán dóigh le hobair a dhéanamh timpeall ar líonra leictreachais.
- Fan cúig mhéadar ar a laghad ar shiúl ó líne chumhachta lastuas.
- Ná gabh i dtreo trealaimh leictreachais atá damáistithe.
- Cuir scairt ar 03457 643 643, thiocfadh dó go sábhálfar beatha duine. Tá Aonad Teagmhála NIE Networks oscailte 24 uair in aghaidh an lae, 7 lá sa tseachtain.
- Le tuilleadh eolais a fháil, tabhair cuairt ar: [www.nienetworks.co.uk/safety/](http://www.nienetworks.co.uk/safety/) / <https://www.hseni.gov.uk/>

**8.1 Má bhíonn tú ag obair le hinnealra mór, fan cúig mhéadar ar a laghad ar shiúl ó línte cumhachta lastuas, cuailí, nó trealamh eile leictreachais.**

## 9. Ré Úr Oiliúna á hAdhaint: D'oscail SDTTÉ Coláiste Foghlama agus Forbartha ar fiú £50 milliún é

Tá Seirbhís Dóiteáin agus Tarrthála Thuaisceart Éireann i ndiaidh an Coláiste Foghlama agus Forbartha a oscailt. Coláiste ceannródaíoch a bheas ann ar fiú £50 milliún é. Beidh athrú ó bhonn ar an oiliúint do chomhraiceoirí dóiteáin san áit seo atá díreach taobh amuigh den Chorr Chríochach.

Oscloíodh an coláiste go foirmiúil é i mí na Bealtaine 2025. Leis an Tionscadal Suaitheanta seo don Rialtas ó Fheidhmeannas Thuaisceart Éireann, rinneadh infheistiú is mó i stair SDTTÉ. Is í seo an chéad áis dá cineál sa réigiún.

### **Mol Fáis agus Nuálaíochta**

Tá níos mó ná bríci agus moirtéal i gceist. Is mol é a tógadh ar bhealach sainiúil ionas go mbeadh an fhoghlaim agus an réadúlacht ann le chéile, áit ar féidir le comhraiceoirí dóiteáin oiliúint a fháil i sainspásanna ionsámlaithe a léiríonn cásanna éigeandála a tharlaíonn sa tsaol mar atá.

Sa choláiste, tá áis tarrthála do thuile, seomra oiliúna, sráidbhaile 'glaoch amach', scioból agus umar sciodair, bonneagair mótarbhealaigh, áis do chomhrac teaicticiúil dóiteáin, foirgneamh do thacaíocht oiliúna agus foirgneamh acadúil. Tá achan chearn den champas deartha le comhraiceoirí dóiteáin a ullmhú do dhúshlán na n-éigeandálaí an lae inniu i dtimpeallachtaí sábháilte, rialaithe agus inár féidir rudaí a dhéanamh arís is arís eile.

Leis an tsaoráid seo, cuirtear tús le turas ina rachfar i bhfeidhm ar an dóigh a n-ullmhaíonn Seirbhís Dóiteáin agus Tarrthála Thuaisceart Éireann a ndaoine, a fhorbraíonn iad, agus a thacaíonn leo le go gcoinneoidh siad an pobal slán sábháilte.

### **Ag dul i bhfeidhm ar Thodhchaí an Chomhrac Dóiteáin**

Is níos mó ná ionad oiliúna é an coláiste nua. Is infheistiú é i dtreo thodhchaí an chomhrac dóiteáin i dTuaisceart Éireann. Áit is í ina n-ullmhaítear earcaigh le go rachaidh siad i ngleic le rioscaí an lae inniu go muiníneach sciliúil seasmhach.

I mí Feabhra 2025, chuir an coláiste fáilte roimh an chéad ghrúpa de Chomhraiceoirí Dóiteáin faoi oiliúint fá choinne cúrsa oiliúna 18 seachtain. Do na daoine seo faoi oiliúint, turas tumthach a bhí ann - lán d'eispéiris úra a rachaidh i bhfeidhm ar a slíthe beatha agus i ndeireadh na dála, ar shábháilteacht achan duine i dTuaisceart Éireann.

De réir mar a théann an samhradh ar aghaidh, is amhlaidh a théann ré nua don oiliúint do SDTTÉ ar aghaidh fosta, ina bhfuil áit croílárnach ag nuálaíocht, comhoibriú agus tiomantas le phobal níos sábháilte agus níos láidre a thógáil d'achan duine i dTuaisceart Éireann.

## 10. Seasmhacht á Daingniú don Ghrúpa Réigiúnach i leith an Leanúnachais Gnó nua

Cuireadh Foghrúpa Réigiúnach Bainistíochta i leith Leanúnachas Gnó ar bun le pleanáil comhoibríthe agus seasmhachta a neartú i ngníomhartha comhpháirtíochta i dTuaisceart Éireann. Leis an chéim réamhghníomhach seo, tá dul chun cinn á dhéanamh i dtreo comhoibríú a fheabhsú in aghaidh rioscaí atá ag fás agus ag forbairt.

Tugann an grúpa le chéile ionadaithe ó eagraíochtaí a bhfuil baint acu in ullmhacht éigeandála, ar bhonn réigiúnach agus ar bhonn foréigiúnach, le dea-chleachtas a roinnt, uirlisí a fhorbairt, agus le comhsheasmhacht i bpleanáil leanúnachas gnó a chinntiú. Fríd eolas a chur le chéile agus fhoghlaim ó theagmhais agus cleachtaí san fhíorshaol, is é an aidhm atá ag an fhoghrúpa ná socruithe Leanúnachas Gnó a thógáil lena cinntiú go leanann seirbhísí ríthábhachtacha ar aghaidh le linn bristeacha.

Is é seo a dúirt comhchathaoirleach an ghrúpa, Anthony McCloskey ó Causeway Coast and Glens Borough Council fá bhunú an ghrúpa: “Tá níos mó i gceist le leanúnachas gnó éifeachtach ná an phleanáil amháin—baineann sé le caidrimh dhílse a thógáil, lena bheith ag foghlaim óna chéile, agus lena bheith réidh le freagairt i dteannta a chéile. Cruthaíonn an foghrúpa nua seo ardán dó sin go díreach.”

I measc bhuntáistí an ghrúpa, tá forbairt teimpléid chomhroinnte, taisclann de threoraíocht agus léargais reatha, béim ar rioscaí atá ag teacht chun cinn, agus uasdátuithe reachtaíochta. Cuireann an grúpa spás ar fáil fosta le riachtanais oiliúna a shainathint agus comhsheasmhacht a chur chun cinn maidir leis an dóigh a dtugann eagraíochtaí ar fud an réigiún aghaidh ar leanúnachas agus ar sheasmhacht.

Fríd obair a dhéanamh lena chéile, is féidir le gníomhaíochtaí comhpháirtíochta freagairt níos aontaithe agus níos éifeachtaí a chinntiú, fríd tacaíocht thabhairt do phobail agus seirbhísí ríthábhachtacha a chosaint nuair is mó an gá atá leis sin.

*Foscríbhinn íomhá 10.1 An Foghrúpa Réigiúnach Bainistíochta i leith Leanúnachas nua*

## 11. Foireann TÉ um Theagmhasacht Sibhialta san Oifig Meitéareolaíochta

Tá sé 20 bliain ó bunaíodh an fhoireann de Chomhairleoirí um Theagmhasacht Sibhialta (CTSanna) san Oifig Meitéareolaíochta, foireann atá ag tacú an phobal seasmhachta agus leis na seirbhísí éigeandála i dTuaisceart Éireann le fiche bliain anuas.

Tá an fhoireann i dTuaisceart Éireann mar chuid den fhoireann Teagmhasachta Sibhialta níos leithne a oibríonn ar fud Sasana, na hAlban agus na Breataine Bige, agus atá i gcomhar le chéile ar thús cadhnaíochta ag gcuidiú le freagróirí éigeandála ar fud na RA rioscaí a mheasúnú. Ní hamháin ó adhaimsir a thagann na rioscaí seo, ach ó ghuaiseacha eile amhail tinte móra, scaoilteáin cheimiceáin, chomh maith le guaiseacha bitheolaíochta amhail galar crúibe agus béil.

I measc na n-imeachtaí níos suntasaí inar ghlac foireann CTSanna páirt, thug sí comhairle do fhreagróirí éigeandála roimh Stoirm Éowyn, lena linn, agus ina diaidh, nuair a d'eisigh an Oifig Meitéareolaíochta an chéad rabhadh dearg riamh do Thuaisceart Éireann. Chomh maith leis sin, thug an fhoireann comhairle do fhreagróirí ar an tionchar a bhíonn ag an aimsir ar fhalscaithe le linn na dtréimhsí tirime i mí Aibreáin agus mí na Bealtaine.

Le 20 bliain anuas forbraíodh tuiscint dhomhain na foirne ar an tionchar a d'fhéadfadh a bheith ann i dTuaisceart Éireann mar gheall ar aimsir chrua, go háirithe Comhairleoir de chuid na hOifige Meitéareolaíochta, John Wylie, atá cuid den fhoireann ón tús in 2005. Bhí comhairleoirí éagsúla ag obair le John i gcaitheamh na mblianta agus in 2024, tháinig na meitéareolaithe Ian Hutchinson agus Bonnie Diamond ón Oifig Meitéareolaíochta nuair a ghlac iar-Chomhairleoir, Eileen Stamp, post leis an fhoireann Teagmhasachta Sibhialta ag Ceanncheathrú na Oifige Meitéareolaíochta in Exeter.

*Foscúbhinn íomhá 11.1 Amlíne a léiríonn 20 bliain de chomhairle Teagmhasachta Sibhialta ón Oifig Meitéareolaíochta.*

*11.2 Comhairleoirí Teagmhasachta Sibhialta ó Oifig Meitéareolaíochta Thuaisceart Éireann*

## 12. Foilsíodh an tuairisc leis an Chros Dhearg, “Leochaileacht agus Seasmhacht”

Tá “[Vulnerability and Resilience](#)”, eisithe ag Cros Dhearg na Breataine. Seo tuarascáil nua ina scrúdaítear braistintí an phobail ar an bhaol tuilte, tionchar na dtuilte, agus an tacaíocht atá ar fáil don ullmhúchán, don oiriúnú agus don fhreagairt. Cuireann an taighde seo le “[Every Time it Rains](#)”, a foilsíodh i mí na Nollag 2022, agus ina gcuirtear béim ar an easpa eolais ar an bhaol tuilte agus ar ullmhacht, go háirithe i gceantair leochaileacha go sóisialta, rud atá ina chúis mhór imní.

Bhí réabadh forleathan mar thoradh ar na stoirmeacha geimhridh in 2023/34—Babet, Ciarán agus Henk san áireamh—rud a leag béim ar an ghá le hath-mheasúnú ar dhearcthaí i leith oiriúnú do thuilte. Ach úsáid a bhaint as fianaise ó níos mó ná 3,300 duine ar fud na Ríochta Aontaithe, pléitear sa tuarascáil oiriúnú sa bhaile, rabhaidh tuilte agus an rochtain ar thacaíocht do thuilte.

### Príomhthorthaí:

- **Méid na dtuilte:** Tharla tuilte d’aon duine amháin in achan seisear agus d’aon duine amháin in achan aon duine dhéag sna 5 bliana anuas.
- **Tionchar ar phobail leochaileacha:** 20% díobh siúd i gceantair ina bhfuil an díothacht ard—áiteanna a bhfuil clúdach árachas níos ísle—thuirisc siad tuilte.
- **Tionchair ar shláinte agus ar chúrsaí airgeadais:** 40% de dhaoine ar tharla tuilte dóibh, thuirisc siad fadhbanna meabhairshláinte idir mheasartha agus trom, bhí fadhbanna folláine coirp ag 35% díobh, agus bhí ualach airgeadais de thairbhe costais dheisiúcháin, athlonnaithe agus árachais ar 42%.
- **Árachas:** Tuairim is nach bhfuil árachas ag aon duine amháin in achan ochtar in aghaidh tuilte sa RA ach tá an figiúr do Thuaisceart Éireann i bhfad níos airde. Thuirisc 1 duine in achan 3 nach bhfuil árachas acu.

### Príomh-mholtaí:

1. Ba chóir d’Údaráis áitiúla/comhairlí sonraí leochaileachta i bpleanáil, oiriúnú tuilte, práinnfhreagairt agus téarnamh.
2. Ní mór eolas, comhairle phraiticiúil agus tacaíocht ar thuilte a bheith dírithe ar na daoine sin is mó a bhfuil siad de dhíth orthu.
3. Tá an comhoibriú le heagraíochtaí seirbhíse deonacha agus pobail ríthábhachtach maidir le teacht chomh fada le pobail leochaileacha le hacmhainní ullmhachta agus freagartha do thuilte.
4. Ba chóir tacaíocht mheabhairshláinte a neadú taobh istigh de phleananna freagartha tuilte, lena n-áirítear oiliúint do fhreagróirí céadchabhreacha agus comhpháirtíochtaí le heagraíochtaí meabhairshláinte.
5. Ba chóir do rialtais tionscnaimh um oideachas sa phobal a leathnú fríd úsáid a bhaint as an [British Red Cross toolkit](#) agus acmhainní eile.

Sa tuarascáil seo, cuirtear béim ar an ghéarghá le bearta in aghaidh tuilte, agus an géarghá le córais tacaíochta níos láidre ar fud na RA. Le tuilleadh eolais a fháil, déan teagmháil le [advocacy@redcross.org.uk](mailto:advocacy@redcross.org.uk)

*Foscúbhinn íomhá 12.1 Tuarascáil Nua ón Chros Dhearg ina scrúdaítear braistintí an phobail ar an bhaol tuilte, tionchar na dtuilte, agus an tacaíocht d'ullmhúchán, oiriúnú, agus freagairt.*

*12.2 Freagairt éigeandála na Croise Deirge ar thuilte*

### 13. Seolann Institiúid Náisiúnta Ríoga na mBád Tarrthála (INRBT) Feachtas ‘*Float to Live*’ i ndiaidh Tarrthála a bhí ráthúil

Sheol Institiúid Náisiúnta Ríoga na mBád Tarrthála Feachtas INRBT *Float to Live* ina n-iarrann siad ar an phobal cuimhneamh ar phíosa comhairle a d’fhéadfadh beatha duine a bheadh ag streachailt san uisce a shábháil.

Is í an teachtaireacht lárnach a bhfuil Institiúid Ríoga na mBád Tarrthála ag iarraidh ar an phobal cuimhneamh uirthi, a roinnt agus a chleachtadh ná: má tá tú ag streachailt san uisce, bí ar snámh le teacht slán (.i. *Float to Live*).

Chuir Carl Kennedy, Oifigeach um Shábháilteacht san Uisce agus Údarás Lainseála ag Institiúid Náisiúnta Ríoga na mBád Tarrthála ag Port Rois, béim ar a éifeachtaí is atá an teicníc seo nuair a luaigh sé siar ar tharrtháil a tharla le gairid. Anuraidh, tharrtháil criú saorálaithe ar bhád tarrthála INRBT slatiascaire a chuaigh i sáinn agus é ag iascaireacht ó charraigeacha ag Port na Binne Uaine. Nuair a tháinig an bád tarrthála a fhad leis an taismeach, bhí an cruth *Float to Live* á dhéanamh aige.

“Tráthnóna Dé hAoine a bhí ann nuair a shéid na glaoirí agus iarradh ar an bhád tarrthála a bhí ar an chladach dul le cuidiú le duine san uisce,” a mhínigh Carl. “Tharraing sitheadh láidir an t-iascaire isteach san fharraige agus é i mbun iascaireachta ag na carraigeacha ag Linn na Scadán. Nuair a shroich foireann an bháid tarrthála ar an láthair, bhreathnaigh siad an taismeach ar dhóigh chlasaiceach *Float to Live*.”

Lean sé leis: “Bhí an fhoireann ar an láthair 17 mbomaite i ndiaidh do na glaoirí séideadh, agus tharrtháil siad an taismeach ón uisce, rug siad ar an bhád tarrthála é agus ansin ghlac siad an duine chuig an chladach agus ansin, d’fhág siad é faoi chúram Otharchairr a bhí ag fanacht ag calafort Phoirt na Binne Uaine. Thug an fhoireann suntas dó: dúirt siad go raibh sé bhí sé chomh maith le fógra *Float to Live*. Rinne sé cruth chrosóg mhara agus bhí sé ar snámh go *compordach* san fharraige bhí beagán corraithe, bhí mórtas farraige ann agus bhí uisce bán ar na cladaigh charraigeacha. Mhothaigh an fhoireann go raibh a fhios ag an duine seo gurbh é an seans a bhí aige ná a bheith suaimhneach, guaim a chur air féin arís, agus a bheith ar snámh le fanacht slán, agus ansin, fanacht ar tharrtháil. “Bhí sé go hiontach don fhoireann an chomhairle tarrthála ón Institiúid Náisiúnta Ríoga na mBád Tarrthála a fheiceáil ag obair.”

Is í an teachtaireacht *Float to Live* an chomhairle a thugann an cumann carthanachta do dhuine ar bith atá ag streachailt san uisce:

- Claon do chloigeann ar cúl, agus do chluasa faoi uisce
- Bí ar do shuaimhneas agus déan iarracht anáil a tharraingt
- Bog do lámh agus do chosa le cuidiú leat fanacht ar bharr an uisce
- Tá sé go breá má théann do cosa faoin uisce, bíonn bealaí éagsúla againn uilig le fanacht ag barr an uisce
- I linn snámha, déan cleachtadh ar a bheith ar snámh ar bharr an uisce

Má fheiceann tú duine éigin i dtrioblóid, cuir scairt ar 999 agus iarr ar an Gharda Cósta.



## 14. Nuacht GUED fá Sheimineár, Cúrsaí Scoir agus Cúrsaí Foirne

Tugann Grúpa Ullmhachta Éigeandála an Deiscirt (GUED) eagraíochtaí tábhachtacha le chéile le hullmhú do, freagra a thabhairt ar, agus téarnamh ó, éigeandálaí, mhórtéagmhais agus bhristeach a d'fhéadfadh a bheith ann sna sé ceantar comhairle a leanas: Comhairle Ard Mhacha, Droichead an Banna agus Craigavon (ADC), Comhairle Ceantair Lár Uladh, Comhairle Ceantair Fhear Manach agus na hÓmaí, Comhairle Lios na gCearrbhach agus an Caisleáin Riabhaigh, Comhairle Búirge na hArda agus an Dúin Thuaidh, agus Comhairle Ceantair an Iúir, an Mhúrn agus an Dúin. Tá an rúnaíocht don ghrúpa fríd an Fhoireann Seasmhachta Réigiúnach, bunaithe in ADC.

Reáchtáil GUED seimineár bliantiúil ar an Mháirt 11 Márta i gColáiste Foghlama agus Forbartha an SDTTÉ ar an Chorr Chríochach. D'fhreastail níos mó ná 100 toscaire agus d'éist siad le cainteoirí ag roinnt a n-eispéiris ag déileáil le mórtéagmhais amhail an tragóid sa Chraoslach. Clúdaíonn sé an dóigh is fearr le tacú leo siúd a bhfuil baint dóibh lena leithéid de théagmhais a fhreagairt, a bheith i láthair ag fiosrúcháin phoiblí a d'fhéadfadh a bheith ann mar thoradh ar a leithéid de théagmhais chomh maith le tacú leis an phobal i ndiaidh eachtraí.

Bhí seimineár díreach ag an am cheart do bheannacht a chur le Ray Hall a bhí ar tí dul ar scor óna phost mar Bhainsiteoir Seasmhachta do cheantar an GUED. D'oibrigh Ray leis an fhoireann ó bunaíodh é agus tá tacaíocht tugtha aige d'obair chompháirtíochta, tógáil caidreamh agus is iomaí dúshlán dár thug sé meon dearfach. Cronóidh an fhoireann é agus beidh sé ina chailliúint mhór don iomaí eagraíocht ar oibrigh sé leo. Deis eile a bhí sa tSeimineár le fáilte a chur roimh Charlotte Daly, atá tosaithe ina ról - is í Charlotte an Bainisteoir Seasmhachta nua. Tá Charlotte ag teacht isteach san Fhoireann Seasmhachta Réigiúnach ó Chomhairle Ceantair Fhear Manach agus na hÓmaí. Tá taithí as cuimse aici i bpleanáil éigeandála. Guíonn muid sonas agus rath orthu beirt sna blianta rompu ina róil nua!

*Foscúbhinn na híomhá:*

*14.1: Toscairí ag freastal ar an tseimineár GUED.*

*14.2: Cáca "mála gainnimh" á bhronnadh ar Ray Morton. Rinne a chomhghleacaí Sandra Morton an cáca.*

*14.3 Charlotte Daly, Bainisteoir Seasmhachta nua do cheantar GUED*